


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-68	Al-Qalam	52	2	Makkiyyah	Ke-2	7





### **Zaman Diturunkan**

Surah al-Qalam diturunkan setelah da'wah terbuka dilancarkan dan selepas berlakunya hijrah ke Habsyah (pada bulan Rejab tahun ke-5 Kenabian), mungkin sekali ia diturunkan di akhir tahun ke-5 Kenabian, pada ketika itu penentangan pihak musyrikin Mekah begitu memuncak dan mereka sudah mula menuduh Rasulullah dengan pelbagai tuduhan seperti مَجْنُون (gila) dan مَفْتُون (gila). Ayat ke-10 hingga ke-15 berkemungkinan diturunkan berkenaan seorang pemimpin musyrikin bernama Akhnas bin Syuraiq at-Tsaqafi, dalam bahagian ini telah dikemukakan beberapa sifat buruk pemimpin kafir Quraisy dan umat Islam dilarang daripada mengikutinya. Ayat ke-16 سَنَسِيبُهُ عَلَى الْخَرْطُومِ pula berdasarkan Asbab Nuzul diturunkan berkenaan dengan pemimpin Quraisy yang terkenal bernama Walid bin al-Mughirah al-Makhzumi.

### **Perkaitan Surah Al-Qalam Dengan Surah Sebelum Dan Selepasnya**

1. Di dalam Surah al-Mulk tersebut inti pati seruan Islam, di dalam Surah al-Qalam ini pula umat Islam dilarang daripada mentaati pemimpin kafir yang menolak da'wah Islam. (Ayat: 8). Di dalam Surah al-Mulk tersebut tuduhan orang-orang musyrikin Mekah terhadap Rasulullah di mana mereka mengatakan Baginda berada dalam ضلال كبير (kesesatan yang teruk), di dalam Surah al-Qalam ini pula Rasulullah s.a.w. dituduh mereka sebagai مَجْنُون (gila). Di dalam surah ini juga disebutkan kisah pemilik kebun yang bakhil yang ditimpa azab dunia.
2. Di dalam Surah al-Haaqqah akan datang pula mula-mula sekali digambarkan pemandangan azab di hari kiamat, kemudian disebutkan pula azab-azab dunia yang telah menimpa kaum 'Aad, kaum Tsamud, kaum Luth, kaum Nuh dan Fir'aun. Di dalam kedua-dua surah, orang-orang musyrikin Quraisy diancam dengan azab dunia yang boleh menimpa mereka.
3. 'Aqal manusia ditanya: “Adakah patut orang-orang مُسْلِمِينَ dan مُجْرِمِينَ mendapat balasan yang sama di akhirat kelak? Adakah pemimpin orang Islam dan pemimpin orang kafir sama keadaannya?”.

### **Beberapa Kata Kunci Dan Tema Utama Surah**

1. Perkataan مَجْنُون berulang 2 kali di dalam surah ini, di permulaan dan di penghujungnya (Ayat: 2 dan 51). Ini membuktikan surah al-Qalam termasuk dalam surah yang diturunkan di peringkat Rasulullah dituduh dengan pelbagai tuduhan setelah Baginda melancarkan da'wah secara terbuka. Maka tidak benarlah pendapat orang-orang yang mengatakan surah ini merupakan surah kedua diturunkan kepada Rasulullah selepas Iqra'.